

四庫全書

史部

欽定四庫全書

明會典卷一百六十五

都察院二

出巡

國初命監察御史巡按刷卷等項諸司職掌所載法制甚詳其後若清軍提學巡城巡關巡茶馬巡鹽巡河捕盜盤糧等項添差漸廣各有勅諭并合行事宜則散見於各部本事之下今各項事例僅舉其略云

諸司職掌

凡分巡按治州郡必須遍歷不拘限期風憲官吏務要同行不許先後相離其經過去處除差撥弓兵防護依律關支廩給應付脚力買辦心紅紙劄之外不許擅令所司和買物貨私役夫匠多用鋪陳等項亦不得縱容官吏出郭迎送其分巡地面果係原籍及按臨之人設有讐嫌並宜迴避毋得沽恩報讐朦朧舉問凡至按臨處所先將罪囚審錄卷宗吊刷外稍有餘暇

首先親詣各處祭祀壇場點其祭器牆宇有無完缺其次存卹孤老審問衣糧曾無支給巡視倉庫查算錢糧有無虧欠勉勵學校考課生員有無成效中間但有欺弊即便究問如律

凡受軍民訴訟審係戶婚田宅鬪毆等事必須置立文簿抄寫告詞編成字號用印關防立限發與所在有司追問明白就便發落具由回報若告本縣官吏則發該府若告本府官吏則發布政司若告布政司官吏則發

按察司若告按察司官吏及伸訴各司官吏枉問刑名等項不許轉委必須親問干碍軍民官員隨即奏聞請旨亦不得擅自提取

凡至所在體知有司等官守法奉公廉能昭著者隨即舉奏其姦貪廢事蠹政害民者究問如律

凡至地方所有合行事件著令首領官吏抄案施行一科差賦役仰本府凡有一應差役湏於黃冊丁糧相應人戶內周而復始從公點差毋得放富差貧那移作

弊重擾於民先具見役里長姓名同重甘結罪文狀并  
依准回報

一圩岸壩堰陂塘仰行府縣提調官吏查勘槩管地面  
應有圩岸壩堰坍缺陂塘溝渠湧塞務要趑時修築堅  
完䟽洗流通以備旱潦毋致失時及因而擾害於民先  
具依准回報

一荒閒田土仰本府正官多方設法召民開墾趑時布  
種其合納秋糧須俟年限滿日科徵毋致拋荒仍將任

內開過田畝數目同依准繳報

一跼驛仰行提調官常川整點各驛船馬鋪陳什物一切完備仍鈐束慣熟稍水人夫常川在驛聽候遞送使客毋得失誤先具跼船人夫什物馬騾頭匹數目并不致違誤結罪文狀繳報

一急遞鋪仰行提調官常川點視鋪舍合用什物完備嚴督鋪長司兵常川在鋪走遞公文毋致磨擦及稽遲沉匿仍禁約往來差使人員不得役使鋪兵損壞鋪舍

如有缺壞即便修理具各鋪司兵姓名田糧什物數目  
回報

一橋梁道路仰令提調官常加點視但有損壞去處即  
於農閒時月併工修理務要堅完毋致阻碍經行具依  
准回報

一稅糧課程仰本府即將歲辦稅糧諸色課程各各數  
目保結開報

一戶口仰本府取勘籍定戶口分豁城市鄉都舊管收



除實在增減數目開坐回報

一學校仰提調官凡遇廟學損壞即為修理完備敦請明師教訓生徒務要作養成材以備擢用毋致因循弛廢仍將見在師生員名繳報

一收買軍需等項仰本府照依按月時估兩平收買隨即給價毋致虧官損民及縱令吏胥里甲鋪戶人等因而剋落作弊違錯具依准回報

一額造段匹等物仰本府即將織染局見在各色人匠

機張歲辦數目關支顏料等物開坐回報

一升斗秤尺仰行提調官照依原降樣式較勘均平毋容嗜利之徒私自造置欺詐小民具依准回報

一詞訟仰本府應有詞訟疾早從公依律歸結毋得淹延妨廢民生及聽吏胥增減情詞出入人罪仍將見問應有囚數分豁已未完結盡實開報毋得隱漏自取罪愆具依准回報

一阜隸弓兵仰行本府并合屬取勘額設名數籍貫田

糧數目開坐毋得多餘濫設有害於民具依准回報  
一節義仰本府取勘境內應有孝子順孫義夫節婦果  
有志能卓異明著實蹟結罪舉保毋得舉富遺貧影蔽  
差徭扶同作弊具依准回報

一原設申明旌善亭但有損壞仰本府嚴督所屬即便  
併工修理條列榜示使善惡知所勸懲毋得視為文具  
因而廢弛先將都隅處所同善惡人數回報

一印信衙門仰照勘本府并所屬應有印信大小衙門

保結回報

一上年分巡官有無寄收贓罰仰本府取勘見數開坐  
已未起解數目回報

一取勘仰本府將所屬去處四至八到畫圖貼說繳報  
一講讀律令仰本府并合屬官吏湏要熟讀詳玩講明  
律意取依准回報

一鰥寡孤獨仰本府將所屬養濟院合支衣糧依期按  
月關給存卹養贍毋使失所仍具孤貧名數同依准狀呈

一倉庫房屋仰行本府提調官常川點視若有損壞即  
便修理及設法關防斗級人等作弊仍將見在錢糧等  
物分豁上年舊管今歲收除實在備細數目同官吏結  
罪文狀繳報

一官吏脚色仰取勘本府并合屬見在官吏姓名年甲  
籍貫歷仕脚色到任月日回報

憲綱

凡監察御史各道按察司官每出巡審囚刷卷必須徧

歷不拘限期

凡監察御史巡按許帶書吏一名照刷文卷許帶人吏  
二名若應用監生臨期奏請按察司官分巡許帶吏典  
二名承差一名皆須官吏監生承差同行不許相離御  
史及按察司官陸路給驛馬水路應付站船監生吏典  
承差陸路並騎驛驢水路應付遞運船俱支廩給經過  
去處量撥弓兵防送不許別帶吏典阜隸人等

凡分巡地面果係原籍并先曾歷仕寓居處所並須迴

避

凡在京及各布政司并巡歷地方倉庫局務等衙門但係錢糧出納去處從監察御史按察司并分司官不時巡視若有作弊就便究治

凡監察御史按察司官巡歷去處若有官吏犯罪畏避追問故將財物婦女潛入公廨設計裝誣沮壞風憲者並許取問實封奏聞犯人處重財物沒官婦女發有司收問其出巡官吏仍不得自生嫌疑迴避致妨巡歷

凡監察御史按察司官巡歷去處所問公事有擬斷不當者都察院按察總司隨即改正當該吏典罪之如律仍將原問御史及分司官擬斷不當事理具奏得旨方許取問

凡監察御史按察司官巡歷去處但知有司等官守法奉公廉能昭著者隨即舉聞若奸貪廢事蠹政害民者即便拏問其應請旨者具實奏聞若知善不舉見惡不拏杖一百發烟瘴地面安置有賊者從重論



凡孝子順孫義夫節婦忠臣烈女志行卓異可勵民風者所在有司舉申監察御史按察司覆實移文所司以憑奏聞旌表

凡監察御史按察司官巡歷去處各衙門官吏不許出郭迎送違者舉問如律若容令迎送不行舉問者罪同如有規避者從重論都司布政司府州官所至亦同凡國家律令并續降條例事理有司官吏湏要熟讀詳玩明曉其義監察御史按察司官所至之處令其講讀

或有不能通曉者依律究治

凡都察院合用筆墨心紅具奏劄付京府按察司合用  
筆墨心紅紙劄行移附廓府分監察御史按察分司巡  
歷去處合用紙筆硃墨燈油柴炭行移所在有司並支  
給官鈔收買應用具實銷筭

事例

洪武六年令御史察舉各處有司官員 永樂元年命巡  
按御史及按察司凡府州縣官到任半年之上察其廉貪

具實奏聞 宣德十年奏准凡在外都司衛所首領官并  
斷事等官從巡按御史按察司考察闕茸無能者起送赴  
部 正統元年議准各處衛所官員聽巡按御史按察司  
照依文職事例一體考察 四年奏定憲體及出巡禮儀  
一風憲為朝廷耳目宣上德達下情乃其職任所至之處  
須訪問軍民休戚及利所當興害所當革者隨即舉行或  
有水旱災傷當奏者即具奏不可因循苟且曠廢其職一  
風憲存心須用明白正大不可任一己之私昧衆人之公凡

考察官吏廉貪賢否必於民間廣詢密訪務循公義以協衆情毋得偏聽及輒憑里老吏胥人等之言顛倒是非亦毋得搜求細事羅織人過使姦人得志善人遭屈一風憲之官當存心忠厚其於刑獄尤須詳慎若刻薄不仁專行酷虐不思罪有大小罰有重輕而一槩毒刑以逞動輒箠人至死不惟有失朝廷欽恤之意抑且禍及身家雖悔無及一居風憲者須用持身端肅公勤詳慎毋得褻慢怠惰凡飲食供帳只宜從儉不得踰分一風憲之職其任至重

行止語默必須循理守法若纖毫有違則人人得而非議之為風憲之累矣故所至州縣取假分毫之物即自玷溷在我無瑕方可律人所至之處須用防閑未行事之先不得接見閒雜人凡官吏稟事除公務外不得問此地出產何物以防下人窺伺作弊一分巡所至不許令有司和買物貨及盛張筵宴邀請親識并私役夫匠多用導從以張聲勢自招罪愆一巡按之處不得令親戚人等於各府州縣等衙門囑託公事及營充勾當一出巡同事之人須相協

和若有所見不同而行事乖舛者可於無人之處從容  
陳說利害以開導之彼心既悟必能從正凡人有言須  
虛心以聽不可偏執已見若聽者能從則言者亦不可  
矜為已功大抵同僚同事當如兄弟相親相愛積誠相  
與未有不相契者凡有善相讓有過相規相規之言只  
兩人自知切不可對衆發之庶其能從凡處同僚不可  
推惡避勞不可妨彼利己不可揚己抑人必務協和以  
相助益不但憲司如此諸司處同僚者亦皆當然一學

校者禮讓之地凡監察御史按察司官所至下學先詣大成殿拜謁禮畢退詣明倫堂生員講說經史監察御史按察司官中坐本處提調七品以上正佐官序坐於左教授學正教諭訓導序坐於右聽講餘皆立聽布政司官下學亦同若布政司按察司官與御史一同下學御史左邊正面坐布政司按察司官依品級右邊正面坐問答之際教官生員不許行跪禮一總兵鎮守官受朝廷委任以防奸禦侮凡調度軍馬區畫邊務風憲官

皆無得干預其相見相待之禮尤須謙敬如總兵鎮守  
官有犯違法重事須用體覆明白指陳實跡具奏請旨  
不許擅自辱慢其軍職有犯具奏請旨已有定例風憲  
官巡歷去處亦須以禮待之並不得輕易陵辱一在外  
鄉試自有布政司官提調按察司官監試其巡按及公  
差問理等項監察御史毋得干預及列名於鄉試小錄  
甚失大體其所試生徒若有情弊聽行糾舉亦不得生  
事誣執其在京鄉試及會試合用監察御史監試如有



兄弟子姪之類在內應舉者亦須迴避一初到按臨之處其都司布政司按察司及衛所府州縣官相見之後各回衙門辦事每日不許伺候作揖及早晚聽事遇有事務許喚首領官吏抄案或佐貳官一員前來發落不許輒喚正官或有合令正佐官計議事務及正佐官自來稟白者不在此例按察司官分巡同都司布政司官所至亦同違者從風憲官舉劾一各衙門問過罪囚或有合斷事理干礙計稟者先令有司定擬罪名然後參

考事例明白方可發落不可輒自與決恐有別例議論  
不同宜從所長一方面官與御史初相見左右對拜方  
面官來見御史前門外下馬由正道入御史延至後堂  
方面官坐左御史坐右及御史回望司前下馬由正道  
入方面官延至後堂御史坐左方面官坐右首領官初  
見行拜禮御史中立還拜一中都留守司官各處按察  
司官相見並如前儀一各衛指揮鹽運司運使同知各  
府知府初見御史按察司官上手立對拜鹽運司副使

判官各府同知通判推官各州知州同知判官各縣知縣及守禦千戶初見御史按察司官中立答拜各衛并鹽運司各府州首領官各縣縣丞主簿初見行拜禮御史按察司官起身舉手各縣典史及倉場庫務陰陽醫學僧道等官初見行拜禮御史按察司官坐受舉手其指揮運使運同知府知州問答之際不許行跪禮一府州縣儒學教官生員初見行拜禮御史按察司官出位中立還拜教官生員相見之後不許每日伺候作揖有

妨肄業一古聖帝明王先師先賢陵墓山川社稷祀典  
祠壇仰本府州縣提調所屬常湏潔淨有損壞者即為  
修理仍禁牧放樵採一山林隱逸懷材秉義之士仰本  
府州縣官究心搜訪舉送赴京以備擢用一鄉飲酒禮  
仰本府州縣行屬照依原降圖式舉行毋得尊卑失序  
其城市鄉村所司宜一體申明遵行無為文貝一本府  
州縣及所屬但有急缺官員隨即徑申吏部以憑除授  
不許稽遲一境內盜賊仰衛府州縣嚴督所屬捕盜官

及應捕之人令晝夜用心巡察擒獲務要盡絕無遺民  
患仍將捕盜官及應捕之人職名開報一巡檢司及關  
津把隘官兵仰衛府州縣督令用心守把凡經過之人  
驗引明白即便放行不許縱放逃軍逃囚及奸細之人  
仍嚴禁約官兵人等不許生事刁蹬取財害民一獄禁  
所當矜恤仰本府州縣官并司獄司官常加點視督令  
獄卒將見禁囚人如法收禁冬設煖柙夏備涼漿合得  
囚糧依數支給若有疾病令醫治療不許縱令獄卒人

等尅落衣糧非理凌虐因而瘦死及將平民枉禁違錯  
仍具獄官吏卒名數及見監囚數開報一指揮千百戶  
鎮撫總小旗並要撫卹軍士各令得所不許生事虐害  
勒取財物及尅減月糧一凡係衛所去處務要高城深  
濠門堞堅壯如有損壞即撥軍餘修理不許怠慢常常  
嚴督軍士各遵紀律守禦地方不許擅離信地擾害人  
民仍於門禁關津守把盤詰奸細但有鄉村人民挑擔  
物貨柴薪等項入城貨賣不許指以盤詰為由生事刁

蹬因而勒要財物一不許縱容潑皮軍餘出入府縣把持官府欺虐良善一管軍官不得縱令軍人離役虛申逃亡冒名代替及私占用營運買賣或作佃戶等項後使景泰元年令在外鄉試仍聽巡按御史監臨天順元年奏准今後每年巡按御史將司府州縣見任官員從公詰察除貪污不法者就便拿問其老疾罷輟等項起送吏部查例定奪如有奉公守法廉能超卓者更替回京之日指實舉奏吏部記其姓名候考滿到部查

考陞用若御史考察不公顛倒是非者參問如律 成  
化三年奏准各處布按司分巡分守官員遇有陳告違  
法事情并奉到勘合應該勘問事理俱要親自勘問及  
訪問軍民休戚官吏賢否并舉行興利除害等事周歲  
滿日交替接管方許回司仍備將問過囚犯完過事件  
開報本司轉呈巡撫巡按等官稽考若有奸慢悞事者  
徑自參奏拏問 弘治十五年奏准各道分巡分守官  
有缺該司掌印官從公將應委職名呈稟監臨衙門查



無違碍依擬施行毋致久缺誤事其有推奸不法者許  
巡按御史指實劾奏

刷卷

諸司職掌

凡監察御史并按察司分司巡歷去處先行立案令各  
該軍民衙門抄案從實取勘本衙門并所屬有印信衙  
門合刷卷宗分豁已未照刷已未結絕號計張縫依式  
粘連刷尾同具點檢單目并官吏不致隱漏結罪文狀

責令該吏親賁赴院以憑逐宗照刷如出卷內事無違  
枉俱已完結則批以照過若事已施行別無違枉未可  
完結則批以通照若事已行可完而不完則批以稽遲  
若事已行已完雖有違枉而無規避則批以失錯若事  
當行不行當舉不舉有所規避如錢糧不追人贓不照  
之類則批以埋沒各卷內有文案不立月日顛倒又在  
乎推究得實隨其情而擬其罪其曰照過曰通照曰遲  
錯曰埋沒此皆照駁之總名而照刷之方又各有其法

今將六房照刷事例各畧舉於後

一照刷吏房起取罷閒官吏文卷假如應天府某年月日承奉吏部劄付仰行所屬應有為事罷閒官員取勘見數一名起送聽用當日立案行移上元等幾縣取勘花名先申到府案催各縣陸續照依原報名數申解完絕取獲實收明白卷內行移又無遲錯事理則刷尾批云照過設若起解未盡行催不絕則批通照其或各縣開稱事故文書到後或半月或數日不行催問則批

云事屬稽遲及有先申某今解某本作某却作某之類  
則批云事屬差錯如是原申十名已解六名外四名未  
解經年歇案不催中間情弊不無則駁之曰埋沒照刷  
州縣吏房卷同

一照刷戶房開墾荒田卷假如揚州府承奉戶部劄付  
仰行所屬應有荒閒田土召人開墾合納稅糧三年後  
依例科徵據江都等縣申報人戶姓名開過田畝數目  
立案候至年限滿日具將起科則例花名田糧數目移

付徵收秋糧卷收科了當卷內別無稽遲差錯事件則批刷尾云照過設若年限未滿申報未絕則批通照其或各縣申稱見行開墾先具人戶花名到府遷延三五日或數十日不行立案行催開過田數則批云事屬稽遲其有原開頃畝該科秋糧十石却作千石之類則批差錯至於原申開過田土比候年限已滿或逾年不行收科或將原報頃畝減多作少其弊顯然則當駁之以埋沒照刷州縣戶房卷同

一照刷禮房買辦祭祀猪羊果品香燭等項文卷先看  
何年月日承奉禮部劄付開到本府合該祭祀社稷先  
聖先賢及風雲雷雨山川無祀鬼神等壇若干處每壇  
計用猪若干羊若干果品香燭等項若干其價照依本  
處時估對物收買仰於官鈔內放支當日立案定限行  
移所屬州縣收買要見回報是何行人物戶時估及差  
委何官眼同收買送官應用仍查筭原估與收買價鈔  
相同已用與原買之數無異俱有行人物戶領狀在卷祭

祀已畢事無施行則批以照過若或已買在官祭祀日期未臨雖皆有發付收領明白事無施行則批以通照其或經違日久纔方立案行移祭期將臨其收買猪羊等項尚有未備顯是怠慢則批以事屬稽遲若或分派各行人物戶所買品數皆同而價鈔不一且如春丁祭先師孔子該猪六口每口價鈔二百貫却共作一千二百五十貫附卷及查行人物戶領狀實領一千二百貫并查放支官錢卷內亦止一千二百貫既已明白別無

規避則批以事屬差錯其或猪羊等項已備祭祀已畢但不見所用過鈔貫花銷不見是何行人物戶收領價鈔及有無餘下物件未用責付何人收領朦朧不明顯有規避則批以事屬埋沒照刷州縣禮房卷同

一照刷兵房勾補軍役文卷先看本府何年月日承奉兵部劄付或都司布政司各衛公文坐勾補役軍丁若干名若當日立案行移各該州縣立定期限解府各該州縣照依坐下名數隨即解到卷內見有原獲合干上



司實收事無施行則於刷尾批以照過若或當日立案照依名數行下各該州縣或全不解到已經節次移文催併差人坐守起解雖已盡絕而無實收則批以通照又或經違三五日甚至十數日纔方立案行移雖各該州縣依數起解未見實收則批事屬稽遲若行移不遲名數不缺中間原坐張某今解李某案內不見審實緣由及駁問所司官吏雖有實收則亦批事屬不明其或已承上司明文雖已立案經年不見催舉間或行移如

勾十名止解到五六名已解者不見實收未到者又不  
舉問顯有窺避則批曰事屬埋沒照刷州縣兵房卷同  
一照刷刑房貪贓壞法文卷先看本府何年月日據某  
人所告詞狀當日曾無立案將本人引審或監或保若  
監收原告要見為何緣故明白立案取具司獄司收管  
在卷若或保在原告要見立案批差皂隸取獲保狀附  
卷其狀內合問人數查照曾無立案分豁被告干連著  
落所司提解又當看本府何年月日據所司依限解到

坐提人數要見當日立案將各人引問責與原告對理  
且如甲告乙受丙贓五十貫乙招如告又告丁贓四十  
貫丁供明白甲自招虛又當看甲乙丙之招詞丁之供  
狀同甲乙丙之服辨曾無題押入卷乙招贓鈔曾無立  
案追徵既已追徵曾無納足有無該庫收貯領狀又看  
有無立案引律擬罪發落又於發落案內先看原發事  
由中間曾無增減原狀緊關情節查批解到月日有無  
淹禁次於問擬招罪項下詳看乙所招受贓情節比甲

所告是否同異却於前件議得項下參詳甲乙丙之罪  
名比律允當並無招涉依例疎放又於照行事理要見  
准工者差人起解的決者立案摘斷免科者疎放寧家  
追足乙名下招受贓鈔責令該庫收貯取獲領狀在卷  
如原發事由內無增減原狀緊關情節問擬招罪內無  
故失出入人罪前件議得下比照律條所擬允當照行  
事理內無人贓埋沒之弊俱已完結事無施行則批以  
照過若或已提未到人數累催不到原追贓鈔催促未

足則批以通照其或受狀不即立案已經數日方纔施行以致提人未到則批曰事屬稽遲若案内字樣不同粘連顛倒以致月日參差官不題押吏不書名之類事已完結而無窺避則批事屬差錯若或囚人招出人贓照行事理內不照追提以致經年不行顯有窺避則批曰事屬埋沒照刷州縣刑房卷同

一照刷工房成造船隻文卷先看何年月日承奉工部劄付坐下本府該造船若干隻每隻計用丁線大小不

等若干斤桐油若干斤麻穰若干斤其價照依時值對  
物收買仰於官錢內放支合用木植著落人夫採所當  
日立案定限行移所屬州縣起集人夫採辦木植要見  
回報起解人夫若干名并所詣處所及已收買丁線等  
物時價差委何人帶領各匠若干名前來場所興造次  
將引各行具領狀支鈔依數收買物料成造船隻查算  
原估與收買價鈔相同已用與原計物料無異船隻已  
起限期不違事無施行俱有各行收買物料領狀在卷

則批以照過若或行移不遲興工不後物料不缺人匠  
不少支用物料未盡原定限期不違舡隻未起事有施  
行則批以通照其或經違數日纔方立案行移其所屬  
州縣合辦物料人匠雖已不缺而船隻亦起終是怠慢  
則批云事屬稽遲若或派料或多或少用工或衆或寡  
且如每船合辦五寸丁線二百斤却買二百五十斤合  
辦三寸丁線三百斤却買二百五十斤之類以致船隻  
未起又違限期中間收買價鈔並無剋落查考各行領

狀在卷文案明白別無窺避則批事屬差錯其或船隻已完不見各船已用物料花銷餘下丁線等物不見責令是何庫分收貯原計料數多已收買數少顯有窺避則批云事屬埋沒照刷州縣工房卷同

憲綱

凡在京大小有印信衙門并直隸衛所府州縣等衙門在外各都司布政司按察司文卷除干碍軍機重事不刷外其餘卷宗從監察御史每歲一次或二歲三歲一



次照刷五軍都督府六部大理寺令該吏具報事目太  
常寺通政司太僕寺光祿寺鴻臚寺國子監翰林院各  
衛令首領官吏具報其餘衙門正官首領官通署呈報  
以憑查刷都察院堂上及各道文卷俱照例送刷中間  
干碍追究改正事理照依已定行移體式施行如有遲  
錯其經該官員應請旨者奏請取問其餘官吏就便依  
照刷文卷律治罪其各都司布政司按察司所屬衛所  
府州縣等衙門文卷從本處按察分司照刷若有遲錯

一體依例施行其照刷之際務要盡心若有獄訟淹滯  
刑名違錯錢糧埋沒賦役不均等項依律究問遲者舉  
行錯者改正合追理者即與追理務要明白立案催督  
結絕不能盡職者監察御史從都察院按察分司從總  
司體察奏聞究治

計各處按察司并分司

浙江按察司

浙東道

寧紹台金  
衢溫處

浙西道

杭嚴  
嘉湖

江西按察司

南昌道

湖東道

湖西道

九江道

嶺北道

福建按察司

福寧道

建寧道

武平道

漳南道

廣東按察司

嶺南道

嶺東道

嶺西道

海南道

海北道

廣西按察司

桂林道

蒼梧道

左江道

右江道

四川按察司

川東道

川西道

川南道

川北道

湖廣按察司

武昌道

湖南道

上下二道

湖北道

荆南道

上下二道

山東按察司

濟南道

東甯道

海右道

遼海東甯道

河南按察司

河南道

河北道

大梁道

汝南道

陝西按察司

關內道

關南道

關西道

隴右道

西寧道

河西道

山西按察司

冀寧道

冀南道

冀北道

河東道

口北道

雲南按察司

普安道

臨元道

金滄道

洱海道

貴州按察司

貴寧道

新鎮道

安平道

思仁道





明會典卷一百六十五

# 欽定四庫全書

史部

明會典卷一百

七十六至七十

詳校官編修臣裴謙

編修臣程嘉謨覆勘

總校官知縣臣繆琪

校對官中書臣高 中

謄錄監生臣鄭文湘

欽定四庫全書

明會典卷一百六十六

都察院三

追問

諸司職掌

凡在外軍民人等赴京或擊登聞鼓或通政司投狀陳  
告一應不公冤枉等事欽差監察御史出巡追問照出  
合問流品官員就便請旨鞫問帶同原告一到追問處

所着令原告供報被告干連人姓名住址立案令所在  
官司抄案提人案驗後仍要抄行該吏書名畫字如後  
呈解原提被告人到不詳停滯即於來解內立案將原  
被告當官引問取訖招供服辯判押入卷明立文案開  
具原發事由問擬招罪照行事理除無招笞杖輕罪就  
彼摘斷徒流死罪連人卷帶回審擬奏聞發落

餘並與  
問擬刑

名相  
同

憲綱

凡監察御史按察司官有追問諸衙門官員取受不公  
刑名等事除軍官京官并熟舊之臣及在外文職五品  
以上官具奏請旨方許取問其餘六品以下取問明白  
從公決斷之後仍具奏聞若奉特旨委問者須將始終  
緣由議罪回奏取自上裁

凡有告爭戶婚田土錢糧鬪訟等事須於本管衙門自  
下而上陳告歸問如理斷不公或冤抑不理者直隸赴  
巡按監察御史在外赴按察司或分司及巡按監察御

史處陳告即與受理推問如果得實將原問官吏依律究治其應請旨者具實奏聞若見問未經結絕又赴本管上司告理不許輒便受狀追卷變易是非須要即時付簿發下原問官司立限歸結如理斷不當及應合歸結而不歸結者即便究問違者監察御史按察司體察究治如不係分巡時月及巡歷已過所按地面却有陳告官吏不公不法者隨即受理追問

凡監察御史按察司官分巡去處如有陳告官吏取受

不公等事須要親行追問不許轉委違者杖一百

凡有軍民相干詞訟等事移文到日其應該會問官員  
隨即前去若無故不即會問及徇徇占悞者從監察御  
史按察司官按問其應請旨者具實奏聞

### 審錄

### 諸司職掌

凡在外布政司按察司都司并直隸府州刑名有犯死  
罪囚人收監在彼止開招罪申達合干上司詳議允當

移文本院通類具奏點差監察御史會同刑部委官按臨審決其到所在官司隨即令首領官吏抄案各該衙門追吊原行人卷赴官叅詳招罪果無出入及審取犯人服辯無異就令所司抄案差委獄卒將犯人押赴法場各照原擬處決將原吊卷宗發還該衙門收照却行具本開坐決過犯人花名回奏仍呈原委官司知會若囚人番異原招即合辨理重提一千人證到官從公對問明白帶回審錄發落其原問官吏果有受贓出入人



罪情弊通行具奏拏問

憲綱

凡各都司布政司所屬并直隸府州縣軍民諸衙門應有罪囚追問完備杖罪以下依律決斷徒流死罪議擬備申上司詳審直隸聽刑部巡按監察御史在外聽按察司并分司審錄無異徒流罪名就便斷遣至死罪者議擬奏聞事內干連人數先行摘斷不須對問者發落寧家必合存留待對者知在聽候直隸去處從刑部委

官與巡按監察御史在外從都司布政司按察司及巡按監察御史公同審錄處決如審異原招事有冤抑者即與從公辦理若果冤抑并將原問原審官吏按問其應請旨者奏聞區處若審錄無異故延不決及明稱冤枉不與伸理者並依律罪之

清軍

事例

宣德二年勅六科掌科給事中各道掌道監察御史推

舉廉能給事中御史各十四員具奏差往各處清理軍役  
正統五年議准在京在外都司衛所不許差人勾軍  
止將逃故等項造冊送部選差能幹御史一十七員分定  
地方請勅前去浙江等布政司并直隸保定等府州清  
理每年八月終仍具清解過軍數回京具奏 天順二  
年奏准清軍御史三年一次赴京查考更替 弘治十年  
奏准清軍御史三年滿日敢有枉道回家及年限未滿  
捏造冊籍回京本院嚴加考察奏請黜退 十五年奏

准清軍御史自到地方日為始扣至三年滿日赴京復命

提學

事例

正統元年選差監察御史才行兼備者二員提督南北  
直隸學校其考試生員黜退為吏及蠲免差役追徵食  
糧等項俱聽照例施行 成化十三年奏准各處軍民  
歲貢生員俱聽提督學校官考試

巡城

事例

正統十三年令巡視京城等項御史凡事有奸弊聽其  
依法受理送問 成化四年令錦衣衛五城兵馬司禁  
約賭博緝捕強盜巡城御史通行提調 五年奏准巡  
視五城監察御史不許監收各場草束 二十一年奏  
准京城坐鋪火夫除官員二門并無丁外其餘勇士力  
士將軍校尉人匠等項家人餘丁例不優免敢有投託  
內府及在外各衙門分付優免者聽該城兵馬司呈送巡

城御史送問 弘治元年奏准在京捕盜官兵人等遇有地方刼殺人財不行用心緝捕聽錦衣衛堂上并巡城御史指實參奏拏問 七年奏准京城九門守門官吏如有私立小班多勒索商車輛等項財物巡城御史拏問

巡關

事例

居庸關直抵龍泉關一帶山海關直抵古北口一帶各差監察御史一員請勅前去公同各該分守守備等項

內外官員巡視關口點閱軍士整飭器械操演武藝并受理守關人等一應詞訟就彼發落不許軍衛有司擅便拘提有悞守把如守備等官有罷輟疾弱不堪任事之人指實具奏替換山海等關每半年鎮巡等官將捉獲軍囚開奏若鎮巡等官怠惰聽巡按巡關御史糾舉若非應捕人捉獲軍囚者給賞

巡茶馬

事例

陝西洮州河州西寧茶馬司三處收貯官茶易換番馬每歲  
差監察御史一員請勅前去申明節次條例提督都布按三  
司軍衛有司并守備把隘等官不許官豪勢要及軍民之家興  
販私茶潛入番境同交易舊例三年一次招番易馬其後  
不拘年限願來者聽所買上中下等馬俱解陝西行太僕寺

巡鹽

事例

宣德十年選差御史一員於直隸揚州府通州狼山鎮



提督軍衛巡司官旗弓兵人等巡捕禁革私鹽 正統

三年令兩淮兩浙長蘆等運司每歲各差御史一員領

勅巡視禁約催督鹽課 十年令長蘆巡鹽御史兼理山

東鹽法 成化九年差御史一員巡視河東運司鹽課

### 巡河

### 事例

成化八年奏准山東濟寧州直抵南京一帶河道兩淮巡  
鹽御史帶管通州直抵濟寧州一帶河道長蘆巡鹽御史

帶管提督所屬軍衛有司時加疏濬修築禁治豪強革除奸弊及督收船鈔點視驛站緝捕盜賊盤檢馬船等項

捕盜

事例

宣德四年以冬月河凍選差御史錦衣衛官各三員往良鄉固安通州三路督令軍衛有司各照地方設法捕盜  
成化二年奏准選差監察御史二員各請勅一員自通州直抵臨清一員自臨清直抵儀真與原差巡河

御史提督捕盜 十四年以朝覲官在途令巡捕御史  
錦衣衛官先河凍時兩月差遣

盤糧

事例

遼東宣府甘肅及湖廣兩廣四川等處每三年各差監  
察御史一員同給事中一員領勅前去各該地方會同巡  
按御史并原管糧官將各倉庫一應糧料草束銀兩吊  
取各年收放卷簿自某年查盤以後但係續收之數逐

一盤驗要見每年收支現在若干草束亦依法丈量并原糴糧料用過價銀數目若有陳腐糠粃不堪之數并虛出盜賣虧折等弊應提問者提問應參奏者參奏施行

雜差

事例

宣德四年差監察御史九員於京城九門整理鈔法每日將各門收過鈔數開坐奏聞又差監察御史一員同給事中會同光祿寺堂上官驗收牲口果品厨料等

物并監收白糧 九年差監察御史一員巡視在京倉  
一員巡視通州倉一員巡視各處收草一員巡視甲字  
等庫一員提督象牛羊等房錢糧一員巡察光祿寺凡  
內外官員人等多支食料及需索搔擾者皆令執奏  
又差御史一員同給事中錦衣衛官巡視官軍騎操馬  
匹不許閒時帶鞍騎坐及馱載等項 正統二年令巡  
視光祿寺御史同戶部主事監收錢糧 又差監察御  
史一員同給事中五城兵馬司五府錦衣衛兵部原委官

存卹清到軍士 五年令各門收鈔御史等官提督守  
門官軍遇有將官馬馱載物件等項拏問 七年奏准  
監察御史除憲綱并詔勅內該載應合御史理辦及軍  
機等項事務如果都布按三司不能完結或完報未明  
者明白具奏取自上裁其餘常事各衙門自行分管理  
辦者不許輒擬奏差委 又差御史一員同太僕寺官  
給俵馬匹 景泰四年差御史一員於兩廣監軍 成  
化元年差給事中御史各一員巡察各營奸弊遇有該

管頭目私役賣放科歛及不行如法操練等項指實劾  
奏 五年各處草場止令本部原委主事等官督同官  
攢收受其御史照舊往來巡視 六年令通州盧溝橋  
等處抽分局監察御史一季一換按月造冊具本會同  
該局官吏御前復命 七年議准在京抽分竹木局五  
處仍令原設官攢照例抽分每季差御史一員與主事  
往來巡視提督

已上巡按巡鹽巡茶馬巡光祿寺巡關巡城巡倉巡

京營御史俱一年滿清軍御史三年滿提學御史九年滿點存卹抽分監收御史俱三月滿刷卷盤糧三年一差印馬一年一差與監試監軍捕盜等項御史事畢即回任管事或御史缺少如清軍刷卷等項以南京御史差遣

侍班糾儀監祭員數

每日奉天門朝泰丹墀二員午門外二員每月朔望日奉天殿朝泰丹墀二員奉天門外二員萬壽聖節正旦



冬至殿上四員丹墀十二員皇太子千秋節文華殿上  
二員門外二員登極頒詔天下殿上四員丹墀十二員  
午門外二員承天門外二員上徽號頒詔天下殿上四  
員丹墀二員午門外二員承天門外二員駕幸太學行  
釋奠禮監禮四員駕還奉天門行慶賀禮丹墀二員祭  
酒等官率諸生上表謝恩殿上二員丹墀二員冊立東  
宮傳制殿上四員丹墀十二員午門外二員承天門外  
二員上表稱賀殿上四員丹墀十二員東宮行冠禮傳

制殿上二員丹墀二員行慶賀禮殿上二員丹墀二員  
文華殿上二員門外二員冊封皇后頒詔天下殿上四  
員丹墀二員午門外二員承天門外二員行慶賀禮殿  
上二員丹墀二員冊封親王殿上二員丹墀二員皇子  
行冠禮殿上二員丹墀二員冊封妃并王妃及行納徵  
禮傳制殿上二員丹墀二員進實錄殿上四員丹墀十  
二員經筵二員進春進歷并科舉傳制狀元率諸進士  
上表俱殿上二員丹墀二員大祀天地誓戒殿上二員

丹墀二員監禮二員五府六部等衙門點齋二十四員  
大祀禮成聖駕回行慶賀禮殿上二員丹墀二員待宴  
二員糾儀四員太廟時享祫祭春秋祭太社太稷太歲  
風雲雷雨等神并祭諸陵監禮各二員祭嶽鎮海瀆歷  
代帝王傳制殿上二員丹墀二員祭先師孔子傳制殿  
上二員丹墀二員監禮二員日月食糾儀六員

南京都察院

事例

凡本院問擬刑名審錄處決重囚及提問職官等項俱與南京刑部同

凡本院副都御史僉都御史奉督操江官軍并巡視江道自九江至鎮江蘇松等處成化九年奏准專督巡江後復令兼督操江官軍

凡南京各衙門聖節正旦冬至千秋節先期進表箋至期習儀行慶賀禮及迎接詔書開讀俱差御史二員糾儀

凡南京孝陵祭祀及祭歷代帝王廟祭先師孔子祭大江之神俱差御史糾儀

凡各道御史糾劾言事與都察院同

凡應天府鄉試差御史二員監試

凡奏差各道御史清軍刷卷巡江管屯鳳陽巡倉等項各有印信在京對道御史關領差人給付事完復命進繳

凡照刷南京光祿寺及南京內府庫文卷給散京衛旗

軍冬夏布疋各差御史一員事完復命

凡監收南京內府各庫布絹差御史一員

凡點閤南京皇城門禁差御史一員

凡巡城兼巡街道正統間差御史一員弘治五年奏准

差二員一員分管中東南三兵馬司一員分管西北二

兵馬司地方

凡監收南京各衛倉及草場糧草南北二處分差御史

二員

凡點閱南京各教場操練官軍差御史一員

凡巡視各衙門人匠存恤各衛新軍監收庫房店舍等項鈔課看裝馬快船隻及石灰山關清水潭秤掣商鹽各差御史或不妨道事暫委監視

凡監收龍江等關抽分竹木差御史一員兼督江東宣課司抽分猪羊等項

凡南京巡江差御史二員一員自龍王關上至九江一員自龍江關下至蘇松等處

凡監收鳳陽糧斛差御史一員正統二年令兼理鳳陽中等九衛所并鳳陽府等軍民詞訟

凡南京巡視屯田差御史一員成化四年奏准專理江北四十二衛屯田遇有詞訟應參奏者備呈總督糧儲都御史具奏處分

凡巡視等項御史正統十三年奏准若係該管事有奸弊聽依法受理送問其告爭田土婚姻錢債及一應不係該管事內詞訟不許接受





明會典卷一百六十六

欽定四庫全書

明會典卷一百六十七

通政使司

洪武三年初置察言司設司令掌受四方章奏尋革十年始置通政使司正三品衙門設通政使左右通政左右參議經歷司經歷知事

諸司職掌

本司官職專出納帝命通達下情關防諸司出入公文

奏報四方臣民實封建言陳情伸訴及軍情聲息災異等事

出納帝命

凡有帝命必當詳審覆奏允當然後施行

通達下情

凡有四方陳情建言伸訴冤枉民間疾苦善惡等事知必隨即奏聞及告不公不法等事事重者於底簿內謄寫所告緣由齎狀奏聞仍將所奉旨意於上批寫送該

科給事中轉令該衙門抄行常事者另置底簿將文狀  
編號用使關防明立前件連人狀送當該衙門整理月  
終奏繳底簿送該科督併承行該衙門回銷

開拆實封

凡天下臣民實封入遞或人齎到司須於公廳眼同開  
拆仔細檢看事干軍情機密調撥軍馬及外國來降進  
貢方物急缺官員提問軍職有司官員并請旨定奪事  
務卽於底簿內謄寫略節緣由當將原來實封御前陳

奏畢就於奏本後批寫旨意送該科給事中收轉令該衙門抄出施行其進繳稅銀文冊勘合通關起解軍囚等項附簿明白止送該科收不須入奏

關防諸司公文勘合

本司置立出入文簿令各房令典分掌凡內外衙門公文到司必須辨驗允當隨即於簿內編號注寫某衙門行某處為某事公文用日照之記勘合用驗正之記關防畢令鋪兵於文簿內書名畫字遞送若行移不當及

違式差錯洗補互相推調等項事重者入奏區處常事  
照依欽定事例在外貼送當該衙門如律在京衙門退  
回改正將發過公文并差錯件數月終類奏文簿繳進  
若各處公文事干軍情災異機密重事隨即入奏送該  
科給事中收如呈稟五軍六部都察院等衙門公文緊  
要者入奏仍用欽降勘合用使本衙門印信云寫旨意  
貼送當該衙門覆奏施行若誤遞到有施行者奏訖亦  
貼送當該衙門無施行者亦入奏送該科給事中收照

月奏

凡本司發過五軍六部都察院及內外諸司衙門公文并照駁各衙門差錯公文實封等件及行移勘合原告文狀拏人起數給由人員每月類奏年終通行類數開奏

事例

洪武十四年令本司職專出納與內外諸司俱無文移有徑行本司者以違制論 永樂四年令本司奏事雖



小必聞

凡每日早朝引奏天下臣民及入遞所奏事或五事七事遇大寒大暑減免奏數不一

凡軍民人等一應奏告詞訟許本司叅詳除謀逆機密重情無主人命全家被人殘害侵欺係官錢糧偽造寶鈔私鑄銅錢并干已事情外中間看係革前并干已事及審出添捏等項虛情例不該奏告就於本後明白叅出抄送法司該道再加詳審立案不行

凡在京大小衙門但係奏出不分公事私事并在外鎮守等項內臣陳情已事巡撫都御史巡按等項御史總兵副叅及分守守備備倭等項武職宣慰宣撫招討等司及府州縣等衙門一應錢糧軍馬刑名乞恩認罪繳勅等項本冊俱赴本司投進

凡每月以前五府等衙門出入公文等項數目面奏送科外其給由起復官員仍奏令吏部查

凡天下府州縣奏到本年雨澤本年終面奏類送戶科

凡本司日逐收下奏本夾板年終面奏令錦衣衛差人運送司禮監交收

凡本司合用紙劄於刑部見收囚人紙劄內關用印色等項原從順天府買用後奏過於刑部支給官錢買用凡有大事命官會議及會推文職大臣本司官皆預凡有大獄命官會問及秋後審錄重囚本司官皆預凡六科中書舍人行移各衙門俱經本司轉行

凡尚寶司六科中書舍人官員俸糧俱從本司帶支

南京通政使司

事例

凡南京軍民人等陳告狀詞置立底簿將狀編號用使  
關防明立前件連人狀送各該衙門整理皆如舊例  
凡南京各衙門公文出入俱赴本司掛號

凡每月朔望日各衙門堂上官會議本司掌印官預  
凡每歲秋後法司會各衙門官審錄重囚本司掌印官  
預

凡南京六科中書舍人行移各衙門俱從本司轉行  
凡南京尚寶司六科中書舍人俸糧俱於本司帶支

中書舍人

國初中書省設直省舍人從八品洪武九年改中書舍  
人正七品後中書省革更定為從七品衙門職專書寫  
誥勅冊符等事

事例

凡本衙門官無正佐例推年深者一人掌印

凡王府自郡王以下至奉國中尉自王夫人以下至鄉君合給誥命俱從吏部奏准送寫

凡親王郡王并妃初受封號合授金冊銀冊俱從銀作局造冊文寫完仍從本局鐫刻

凡公侯伯初受封爵合給鐵券從工部造完送寫誥文轉送銀作局鐫刻以右一面頒給左一面年終奏送古  
今通集庫收貯

凡内外文武官應給誥勅從翰林院領寫該用軸數於

御前奏過印綬監關出寫完與尚寶司及該科官同於奉天門用寶訖本衙門收貯從該部請旨頒給

凡寫完誥勅類成寶簿一品二品各一扇三品至五品共一扇六品至九品共一扇其在外官品級雖與京官相同俱列于後每年終於御前奏過送古今通集庫收貯

凡誥勅軸俱南京織染局織造齋送印綬監交收本監會同本衙門官選檢收貯或不堪用仍會同叅奏

凡寫誥勅年月成化二十三年奉旨照奏准年月填寫  
凡誥勅勘合底簿係印綬監收掌每遇該關數目赴本  
監依品級填寫其字號舊用二十八宿等字永樂以後  
改用急就章編寫

凡編字號公侯伯本身并追封用仁字蕃王亦用仁字  
文官本身用十二支字追封用文行忠信字武臣用千  
字文以上每字編滿一千號仍從前續編若王府并駙  
馬都尉俱不編號



凡寫誥勅合用紙劄筆墨具奏於司禮監關用其武官誥勅合用紙劄筆墨該兵部具奏行順天府買用

凡武官誥命舊例用監生謄黃并寫誥共八十名成化十三年定用三十五名內十五名謄黃二十名寫誥

凡親王之國勅符字號赴內閣謄寫

凡大祀天地分官二員隨駕供事

凡萬壽聖節正旦冬至及傳制傳臚等項各分官四員於奉天殿侍班

凡東宮千秋令節并正旦冬至分官二員於文華殿侍班

凡會試委官一員與制勅房官收掌試卷

凡每日各官并監生酒飯俱光祿寺供給

凡各官俸通政司關支監生月糧兵部關支

凡本衙門行移各衙門俱從通政司轉行文華殿門東房別設中書舍人分直職專奉旨書寫書籍等項內官職陞遷不一不拘員數

南京中書舍人

後不設

吏科

國初總設給事中正五品洪武四年改正七品六年始分吏戶禮兵刑工六科各設給事中從七品二十四年添設都給事中正八品左右給事中從八品改給事中正九品職專叅駁糾劾等事後又定都給事中正七品左右給事中給事中俱從七品各科並同

事例

凡吏部引選文職官員掌科官一員與本部尚書侍郎同赴御前請旨選用并看用選官印子填寫榜文

凡吏部選除在外衙門官員該領赴任文憑俱先赴本科畫字定限考滿官復任同

凡吏部初選有司官該領為政須知俱先赴本科畫字  
凡吏部累次選過官缺除大選外每一月或兩月堂上官赴科附簿以備查考

凡吏部貼黃本科官一員會同稽勲司官赴印綬監領貼

凡吏部累次選除過官員職名附寫文簿用寶年終本科奏送印綬監轉送古今通集庫收貯

凡尚寶司奏過文職官員合給誥勅用寶本科官與中書舍人吏部驗封司官同赴奉天門監視其合追奪從吏部奏繳者亦會本科官燒燬

凡長安左右門守衛官繳到文職朝官門籍查有填注

公差患病等項於次月具奏

凡在京文職官員丁憂該領孝字號勘合吏部開具送科填寫各官俱先赴科畫字

凡天下諸司文職官員考滿到京各具給由文冊送科稽考

凡天下諸司官吏三年朝覲到京奏繳須知文冊到科查出錢糧等項數目差錯者經該官吏叅奏究治

凡各衙門大小官員不由吏部銓選推舉徑自朦朧奏

請乞恩傳旨陞除等項本科叅出施行

凡內外衙門及巡撫巡按等官保舉官員未當或交通  
囑託濫保官員准本科俱叅出施行

戶科

事例

凡有司徵收秋糧南京戶部照例刊印勘合給付糧長  
將本區合徵稅糧依期送納各該倉庫填寫實收數目  
奏繳其勘合仍送本科註銷

凡各鹽運司提舉司合辦鹽課年終具辦完實數造冊奏繳就差該吏赴科註銷

凡各河泊所魚課年終具辦過數目填完原降勘合奏繳送科收查

凡在京各衙門放支過糧數每月造冊赴科註銷

凡各府州縣管糧官員及各倉場大使等官考滿給由各親齋本冊赴科交查

凡街市鋪行不拘軍民人等例各當差本科時常清理



凡光祿寺該收錢糧每季本科差官一員監收

凡甲字等庫官遇考滿等項本科官一員引奏將放過錢糧等物委官查盤

凡應天府龍江關每年三月將批過各處進關糧米數目差吏來奏本科官引奏令該衙門查理

凡戶部差官監收各處糧米本科官赴司禮監填給精微勘合批文一道給付歲滿更替回還仍將原批赴監銷繳

凡遇節日等項賞賜各衙門官吏監生人等鈔錠本科官於午門裏照數給散若各科監生辦事半年已滿每人例賞胡椒折鈔亦從本科給散

凡戶部關給京官折俸絹布等物每月該本科官按冊磨算如有差錯者叅奏

凡戶部關給軍官折俸銀兩每季本科差官一員會同給散

凡賞賜京衛軍士冬衣布花例出榜文本科掌科官同

給事中一員捧榜面奏付長安右門守衛官領出張掛  
其冬衣布花本科與各科每年輪差一員會同給散  
凡甲字等十庫該收錢鈔等物每季本科與各科輪差  
官一員監收

凡查盤邊方糧草本科與各科官輪差

凡巡視各處牧馬草場及種苜宿園地本科與各科官  
輪差

禮科

事例

凡每日各衙門御前面奏并封進奏本等項事理俱先具印信奏目送本科查考類寫奏目送司禮監進呈

凡官員人等節錢路費鈔錠及辦事已滿監生折鈔胡椒并外國賞賜衣服等件俱本科出票給賞仍面奏數目其前月總數仍於月終面奏

凡御史出巡印信及鎮巡等官關防俱從本科畫字出給字號關繳

凡行人序班監生差往各王府祭葬報訃伴送夷人等  
項該給內府精微批文俱從本科定限事畢送科銷繳  
凡朝叅官員牙牌應改造者從禮部手本關領俱由本  
科出給字號

凡內外給由公差官吏人等朝見本科官引奏該衙門  
整理

凡錦衣衛差人勘提囚犯到京本科官引奏請旨

凡禮部給度僧道本科差官一員會同考試

兵科

事例

凡兵部引選襲替武職官員掌科官一員與本部尚書侍郎御前奉旨同選并看用選官印子

凡兵部選過官員赴任俱先赴本科畫字具文憑定限給付

凡內外武職比試及總小旗併鎗本科官一員會官監視定其對偶并批中否送兵部施行

凡內府各門進出事件并內官出入皆有印信大小勘合填寫關防本科官編成字號并置底簿小勘合用本科印大勘合用司禮監精微印領出每三日俱給與守衛官員填寫出入事件填完小勘合送內府收大勘合送本科收以憑查考

凡皇城內外守衛官軍三日更代每班各衛經歷開寫名數具奏本送本科類寫揭帖次日早掌科官於御前奏進及祭享朝賀圍宿官軍并朔望東駕侍衛官軍五

府各衛俱開寫名數具啓本送本科類寫揭帖先一日於御前奏進

凡揀選守衛及操練官軍本科差官一員會選

凡東南西北四城兵馬司官每月三日一點各城守門官軍點過本日晚各具奏本送科類寫揭帖次日早送司禮監

凡兵部造完武職貼黃及續附貼黃并中書舍人寫完武職誥勅尚寶司官用寶俱本科官一員監視其誥勅



有應追奪者亦同尚寶司官燒毀

凡在京各衙門公差人員合給內府批文俱赴本科關領鑰匙赴司禮監開門給付事完仍赴本科關領銷繳凡登聞鼓下所受狀詞并口外投降男子該收勇士番人習儀該撥馬騎年例打冰打蓼草等事該撥軍士但奉旨該本科承行者錦衣衛當直官填寫駕帖送本科簽名給與施行

凡午門外直宿將軍於夜間或因祭祀遞出鑰匙或以

物投下試驗警忽將軍即赴科來報早朝本科官引至御前奏知

凡邊方險阻關堡并衝要地方每三年各邊官畫圖送本科收貯

凡各邊鎮巡等官造獲功及陣亡官軍若出境燒荒里數并撥過官軍文冊俱送本科收查

凡各邊巡撫官并南北直隸奏差御史印烙過馬駒及南北太僕寺苑馬寺各都司等衙門印俵過馬牛等數

及天下給過驛馬數南京造過馬快等船并差過起數  
各造冊送科收照

凡天下清軍御史清過軍士三年一造冊巡按御史及  
二司府州縣官問過充軍人每年一造冊送本科收照  
凡兵部清理在京各衛軍士本科差官一員

凡每年巡視各草場牧放馬匹官軍本科差官一員

凡兵部存恤京衛勾到各處軍士每月本科差官一員  
凡每月巡視官馬本科與各科輪差官二員

凡每月單日巡視皇城宿直官軍本科與各科輪差官  
二員

凡每月點閱各營操練官軍本科與各科輪差官一員  
凡南京內官出入公幹并皇城四門出入事件填過精  
微勘合將盡先行具奏兵部轉行本科將該給勘合編  
完字號赴司禮監用精微印并附底簿給出發南京兵  
科給用

刑科

事例

凡法司送到原報并續收實在囚人數目揭帖每月三次本科早朝奏進

凡法司具奏斬絞罪囚決不待時并秋後處決者本科仍三覆奏得旨然後行刑

凡擊登聞鼓訴寃并錦衣衛等衙門捉獲人犯三法司處決罪囚奉欽依者俱該錦衣衛直日官將原給駕帖填寫緣由并人犯姓名除鼓下詞狀從各科直鼓官批

送外其餘俱送本科列名批鈐以憑送問處決

凡法司見監斬絞罪囚在獄病故者各用手本送本科註類以備覆奏

凡法司問過罪囚各用揭帖每月初一日輪報各科查對相同填寫精微文簿仍類送本科收貯

凡在外問刑衙門每年將完銷過兩京法司行移勘合填寫底簿送本科收貯以備查考

凡每月五城兵馬司捉獲囚數具奏送本科備照

凡每月初法司問過軍職住俸京軍記罪各具報本科  
附簿以憑查考

凡各衙門於東安等門進出一應錢糧先該本科編成  
字號勘合底簿戶部用印發各門吏收掌將勘合比對  
朱墨相同仍以略節填寫底簿送本科稽考

凡奉旨差官勘問在外事情本科與各科官輪差

凡歲終法司問擬過輕重罪囚開數送本科類奏

凡法司奏差勘事審錄決囚等項官員都察院奏差御

史巡按及奏差監生書吏人吏赴各該清軍刷卷提學  
巡鹽巡茶巡關等項御史處書辦各該請給內府精微  
批文各具手本赴本科轉給本科仍照各項批定立限  
期轉發各衙門給付事完各齎原批赴本科轉送內府  
銷繳

工科

事例

凡工部軍器局製造軍器本科差官一員試驗



凡囚人運磚贖罪工部於司禮監關領精微簿二扇法司附簿送本科每月一注以憑稽考

凡工部奏差造墳抽分等項官員各該請給內府精微批文具手本赴本科轉給本科仍照批定期限給付事完各齎原批赴本科轉送內府銷繳

凡南京龍江瓦屑壩二處抽分竹木等物每季將收放過數目造冊差人賫繳本科官引奏查理

凡南京差軍士栽種過漆桐梭樹苗秧管領百戶具數

前來本科官引奏

凡囚人工役運炭等項工部按季委辦事官管領遇有逃者本科官引奏挨拏

凡營建監工本科與各科官輪差

凡番中走回男子收充勇士該給房價者錦衣衛官齎帖到科批寫送部

凡各衙門於午門西安門進出一應錢糧該本科編成字號勘合底簿戶部用印發各門吏收掌將勘合比對朱

墨相同仍以略節填寫底簿候完俱送本科稽考

凡南京六畜場并在京宣課司等衙門抽分猪羊等物  
本科編成字號勘合用印送司禮監等衙門轉發填用  
六科通行事例

凡每日早朝六科輪官一員於殿廷左右執筆紀錄  
聖旨仍於文簿內注寫本日某官某欽記相同以防壅  
蔽

凡處置禮儀邊務等事及軍民人等陳言有關大體者

掌科官奉旨同文武大臣會議

凡舉用文武大臣如總制總兵之類奉旨會推掌科官  
皆預

凡兩京大臣方面等官有不職者俱得劾奏或大班面  
劾及諸人有不公不法等事俱當劾奏

凡三年天下諸司朝覲畢除黜退外其有公事未完等  
項俱大班劾奏

凡一應題奏本內違碍事情及字樣差謬洗補迹污等

項叅出該部抄行

凡各衙門題奏本狀奉旨發落事件開坐具本戶禮二科俱送吏科刑工二科俱送兵科每日早朝六科掌科官同於御前進呈

凡各衙門題奏發下聖旨各該衙門堂上官一員隨赴本科批押于後

凡六科每日收到各衙門題奏本狀奉聖旨者各具奏目送司禮監交收又置文簿陸續編號開具本狀俱送

監交收

凡各衙門題奏過本狀俱附寫文簿後五日各衙門具發落日期赴科註銷過期稽緩者叅奏

凡各衙該朝官各具職名置卯厯一扇輪送各科每日早各官赴科領厯畫卯仍將前厯送科月終查考若五卯以上不到者叅究

凡內官內使傳旨各該衙門補本覆奏再得旨然後施行

凡行慶賀大禮各科官十員導駕二員導表傳制導駕員數同東宮行慶賀禮導駕導箋俱二員

凡每歲大祀天地都給事中各一員入壇陪祀或分獻給事中各一員從駕供事

凡郊祀慶成各科官一員於殿上侍宴

凡經筵各科輪官二員侍儀

凡殿試舉人掌科官充受卷等執事官

凡冊封宗室及蕃王或告諭夷邦各科官充副使或正

使

凡三法司奉旨於午門前鞫問罪囚許掌科官同問  
凡登聞鼓下每日各科輪官一員如有申訴冤枉并陳  
告機密重情者受狀具題本封進如決囚之日有訴冤  
者受狀後批手令校尉停決候旨

凡各科官員并監生俸糧於通政司帶支

凡各科官員并監生每日酒飯俱光祿寺供給

凡各科合用紙劄於刑部關用印色於順天府買用



凡各科行移各衙門俱經通政司轉行

南京吏科

事例

凡直隸府州所屬司獄司等衙門給由官員該給文憑  
南京吏部考覈過俱赴本科填給

凡南京各衙門官丁憂除堂上官外其餘該給孝字號  
勘合者俱赴本科填給

南京戶科

事例

凡南京各衙門放支過糧數每月造冊赴本科註銷

凡天下造到戶口黃冊俱送後湖收貯本科官與南京戶部官專管查理曬晾等項

南京禮科

事例

凡南京各衙門差官等項精微批文俱赴本科附簿回

日註銷

南京兵科

事例

凡直隸各衛所總小旗併鎗本科官監視

凡南京各教場該操軍時月本科官點閱

凡馬快船裝載進鮮并進用物件本科官監視

南京刑科

事例

凡每歲秋後審錄重囚本科與各科官皆預

南京工科

事例

凡南京內府衙門及皇城門鋪等處損壞合該修理工  
程大者本科官與南京工部等官會勘具奏修理

凡南京丁字戊字等庫軍器錢糧本科與內官同收

南京六科通行事例

凡糾劾言事及行移等項俱與六科同

凡公差官員人等精微勘合各科俱掌管出給

凡每年錦衣等衛所軍士該給冬衣布鈔各科輪散

凡估計兩京光祿寺等處并監收南京甲字等庫錢糧各科輪管

凡南京皇城內外守衛及京城內外守門官軍各科輪點

凡各處解到軍人於各衛所存卹各科輪管

明會典卷一百六十七